

Headline	Pengalaman luar biasa anak yatim		
MediaTitle	Sinar Harian		
Date	27 Jan 2013	Color	Full Color
Section	Mahkamah	Circulation	60,000
Page No	26	Readership	180,000
Language	Malay	ArticleSize	788 cm <sup>2</sup>
Journalist	Roshlawaty Raieh	AdValue	RM 4,334
Frequency	Daily	PR Value	RM 13,002



ROSHLAWATY RAIEH  
roshlawaty@sinarharian.com.my

# Pengalaman luar biasa anak yatim

Seramai 40 kanak-kanak dari tiga rumah anak yatim berpeluang menimba pengalaman berkhemah semalaman di Institut Penyelidikan Perhutanan Malaysia (FRIM) atas jemputan Majlis Perakayuan Malaysia (MTC).

Kanak-kanak berumur antara 9 dan 16 tahun itu datang dari Rumah Amal Limpahan Kasih, Pusat Jagaan Baitul Hidayah di Puchong, dan Rumah K.I.D.S. di Subang Jaya.

Mereka menghabiskan baki cuti sekolah dengan menyertai aktiviti dua hari di Kem Perah yang mendedahkan kepada persekitaran luar dan kehijauan alam semula jadi.



Suria (depan) memberi keterangan maklumat berkenaan pengurusan hutan lestari kepada peserta yang hadir.

Oleh sebab perkhemahan itu adalah kali pertama bagi kebanyakan kanak-kanak, aktiviti bermula dengan ranger FRIM mengajar mereka bagaimana memasang khemah sendiri sebelum memulakan perjalanan menyusur hutan untuk ke Titian Silara FRIM yang termasyhur.

Ranger FRIM menggunakan kesempatan itu untuk mendidik mereka tentang pelbagai pokok dan tumbuhan yang dilihat sepanjang laluan.

Perjalanan yang mencabar sejauh 500 meter untuk sampai ke Titian Silara benar-benar menguji semangat dan keberanian kanak-kanak yang tidak gentar menyeberang jambatan gantung sepanjang 200 meter setinggi kira-kira 30 meter di atas paras bumi. Mereka berhenti seketika antara platform untuk menikmati pemandangan indah latar langit Kuala Lumpur.

Selepas menyeberang jambatan gantung yang tinggi di atas pokok, mereka kembali ke Kem Perah untuk menyahut cabaran perlumbaan berhalangan yang menguji daya ketahanan, kepantasan, kerjasama berpasukan dan kebijaksanaan.

Pada petang yang sama, Pengarah Kanan Bahagian Komunikasi dan Pelaburan MTC, Suria Zainal, memberi penerangan kepada mereka tentang dasar pengurusan hutan lestari Malaysia, termasuk pemuliharaan dan pengurusan rapi alam sekitar dan sumber asli negara.

Beliau menyifatkan aktiviti perkhemahan sebagai satu pengalaman pembelajaran untuk mendedahkan kanak-kanak kepada sumber-sumber

asli negara dan mendidik mereka tentang pentingnya pemuliharaan alam sekitar dan penggunaan sumber hutan secara bertanggungjawab.

"Hutan mempunyai banyak sumber yang kita gunakan dalam kehidupan setiap hari seperti kayu untuk perabot, surat khabar, buku dan kertas tisu. Ia juga bertindak sebagai habitat semula jadi bagi banyak spesies binatang.

"Itulah sebabnya kita mesti menguruskan hutan dengan berhati-hati untuk mengelakkan kepupusan spesies

Berkhemah beri impak positif pada golongan ini



Peserta melalui jambatan gantung dengan penuh debaran.

haiwan yang terancam atau menyebabkan kerosakan kepada alam sekitar," jelas Suria. Sementara itu, acara perkhemahan yang paling menarik ialah ekspedisi unik berjalan malam menyusuri hutan untuk melihat dunia misteri haiwan malam yang menakjubkan.

Pengalaman Berjalan Malam ditemani ranger FRIM sebagai pemandu menjadi lebih indah dengan bulan mengambang penuh, menerangi kegelapan malam.

## Pencarian harta karun menjadi pilihan

Keesokannya, peserta tidak sabar untuk menyertai perlumbaan mencari harta karun yang merupakan acara kemuncak perkhemahan dua hari tersebut.

Mereka dipecahkan ke dalam kumpulan empat atau lima orang dan dikehendaki menyelesaikan teka-teki, berpandukan petunjuk kepada jawapan yang terdapat di sepanjang laluan yang disusuri mereka pada hari sebelumnya.

Tiga pasukan memenangi hadiah daripada MTC kerana menduduki tiga tempat teratas manakala selebihnya menerima sagu hati berupa hamper berisi barang keperluan.

Matthew Lee, 13, dari Rumah K.I.D.S. menyifatkan perkhemahan sebagai pengembaraan hebat dan berharap dilanjutkan untuk jangka waktu lebih lama. Pengalaman itu juga ternyata menggembirakan dua beradik kembar, Mohd Airel Ezani dan Mohd Airel Ezhar, 9, dari Pusat Jagaan Baitul Hidayah, yang seronok bermain di luar dan memerhatikan serangga hutan dalam habitat semula jadi mereka.

Mengulas mengenai perkhemahan itu, Suria berkata, ini kali kedua MTC menganjurkan perkhemahan untuk kanak-kanak kurang bernasib baik.

"Saya gembira melihat mereka seronok. Kami berharap untuk meneruskan usaha ini dan menggalakkan generasi sekarang menghargai dan mencintai alam persekitaran semula jadi kita," katanya.



Sebahagian peserta yang menyertai aktiviti perkhemahan di FRIM.